

劉

孟

塗

集

詩肇自風雅繼以十九首魏晉以來代有名作相傳自晉而後

行於今日幾幾乎家能吟詠戶有鐙板噫何詩之多世起唐人

於九原能無覆瓿杯水之嘆乎其中文體屢變珉玉維陳在諸

者有以辨之耳余夙聞皖江才子劉孟涂之名曾於宋人集

見其詩集彼時軍務倥傯未遑卒讀爲憾辛未莫春其哲嗣少

涂南旋道經宛郡以詩文全集見示軒窗風雨如遇故人快讀

一過古今各體詩原本風騷規模漢魏洵足以凌轢六代追跡

三唐其文集則潘江陸海渾渾灝灝皆能直舉胷臆不傍古人

如此奇才求之時下不可多得也少涂念手澤之遺篤續承之

志復搜輯廣列女傳論語補注各種遺書以公諸世是克負荷

也一日問序於余夫詩文集之美時賢評語已盡知有合於風

雅古詩之遺意余何序爲因綴數言於簡端以誌景仰云爾三

韓長慶識

序

曾生讀劉生詩未及終卷喟然而嘆曰吾聞仙骨稟之自然慧
根修于夙昔詩之有才也其亦由天授乎夫子山之賦老而更
成少陵之律亦老而漸細劉生年甫二十有七而所詣已如此
殆元門之先覺禪機之頓悟乎觀其舉杯屬月攜句問天眼空
四海神遊八極如黃帝張樂洞庭之野金聲玉振不主故常如
王母宴客瑤池之宮琅菜綺葱絕非世味則青蓮之嗣響也至
其鋪陳終始排比聲韻雷電開闔江海浩漾仗天策而騎箕尾
儼勾陳而界雲漢文似得之康水石上句可書於天帝扇頭則
浣花之的派也若夫前溪七曲子夜四時採蓮折柳之歌玉樹
春江之調響低徊而欲絕情瞳眈而彌鮮足以閤合曩編哀感
頑艷則又齊梁之妙手也且夫沈約論詩厥有八病吾謂非後

人所患也後之病者蓋于陸機文賦盡之或遺理存異尋虛逐微真宰弗存文無止泊其病也蕩或防露桑間嘈囋妖冶雕績滿眼風骨不飛其病也淫或窮迹孤興除煩去濫神明未浹淡乎寡味其病也瘠或言靡音瘁妍媸混體成法盡廢古意蕩然其病也亂之四病者又患闇于自見謂已爲賢各以所長相輕所短故大雅寥寥也拯病之藥豈無薑桂用藥之人必藉扁盧吾觀自宋以來於斯爲盛生又傑出此道益昌削鑠于神志之間斷輪于甘苦之外願生以金鍼度我也南城曾燠

題辭

董醇賈茂結苔岑餘事猶看擲地金學海瀾翻窺百代文壇嶽
立聳千尋願爲清廟朱絃奏不枉高山白雪吟邱壑養成垂蔭
遠用集中咏大木句意逢時方遂濟時心

礪堂蔣攸銛

劉生來何方長揖登我堂故人陳查宋書來盛揄揚年華終賈
少才力韓蘇當爽氣浮玉頰炯炯雙眸光袖中出詩文崛鬱不
可藏文成如翻水以氣爲短長蕉蘊細抽剝波瀾浩汪洋頗出
經世語脫畧句與章倘令老生見舌本爲之強詩才更超越麗
則宗三唐紫蘭秀空谷皓露含幽香有時放直幹天地爭低昂
崩豁九霄霧倒落千仞岡腹擬萬卷挂力可九鼎扛紛紛噉名
子欺世目少睚虛聲借羔鴈餒敗飽啖嘗蔓草莽荆棘頽波蕩

濤瀧不調靡靡中獨矚治水航問源數星宿直到天河傍回視
地上友無異羣吠尤君才誠卓犖君心何悲傷二十困一衿飄
泊潯陽江艱難博甘旨老母門前望彈鋏歌未就一刀橫海邦
我久廢文字朱墨紛匆忙豈無唱酬侶百怪投雜咙繁音傾衆
耳箏琶間笙簧以此束高閣嬾情逾星霜忽枉霞上作等閒起
且僵初讀口詰屈蠶叢闢鴻荒再咏得針芥鉤餌中我腸始信
故人言衆中有乘黃一泓古池水星斗中迴翔奇峰回秀姿四
面來虛牕與君結交始何必多老蒼酒酣縱談論肝胆森劒鉞
詩豈能窮人經史足糗梁君氣益就斂我心則已降今世無退
之籍湜皆粃糠知沿而不止鳴乎其可量

桂舫韓封

海濶天空任所之蛟龍鬱律鳳鸞姿江山有助供行卷花鳥多

情騁妙辭天若愛才生此筆經堪致用不徒詩一尊夜話千秋
彌堂前輩不輕許可
獨於孟塗一見傾倒

笠鵬陳預

卯金才子龍眠客手扶天孫錦七襄幻出雲霞生古色濯來江
漢發奇光洲晴芳草題鸚鵡陂老蒼苔弔騶駟不信三閭人去
後到今蘭芷爲君香

大文球璧細珠璣巨帙衰編見亦稀鏤月裁雲辭絕妙驅山走
海筆驚飛騰空駿馬無行地信手雕龍有化機見說郢歌饒白
雪幾人堪共理金微

覺生鮑桂星

題孟塗詩集卽送之楚

人中之麟文中虎此才一出無今古大兒文舉小德祖餘子紛

紛何足數盛年意氣橫九霄白日風雲生咳唾雄師直搗千重
圍餘勇猶開萬鈞弩欲窮造化探元精沉思苦吟戰風雨揮電
爲鞭月作斧上叩天闕下地府天缺地陷媧皇愁鍊石無功筆
力補羣仙大笑山鬼泣天女擲花爲起舞陰陽離合無常蹤搜
羅萬象歸陶鎔三唐兩漢到此盡四始六義追其宗年來三戰
忽三北垂天之翼驚回風孤琴獨彈廣陵杳劫火燒盡龍門桐
天生奇才獨破格忍令抑塞悲途窮寶刀在腰杯在手背負詩
囊渡江走踏破匡廬萬疊雲痛飲故人一斗酒故人薄宦寒如
冰滿面塵封一寸厚九州何處豁雄心一時忽縱談天口中庭
不雨風蕭蕭銀河倒影星動搖酒酣拔劍髮直豎投筆直走驚
班超吁嗟乎男兒讀書期報國千古經綸定一室文章海內幾
人存四座驚呼兩狂客孤帆獨掛湘江風高吟夜半騰蛟龍我

欲從之騎黃鶴漢陽山色青重重

夢白鄭祖琛

讀孟塗集奉題四律

怒潮疾捲歸文筆明月招呼落酒杯

集中有絕業早成驚老輩月下吟

遨遊太久負多才饑鷹自有凌霄勢天馬休深伏櫪哀生就珊

珊仙骨好好如君終要到蓬萊

詩歌合樂本唐虞直溯淵源自太初

見集中擬古詩敘

吾道不孤端賴

此古人可作待何如感深師友愁將母游盡山川讀破書莫怪

哀編成巨帙抵他一字一碑礫

太白樓頭弔謫仙凌雲才調比青蓮芳蘭自結騷人佩玉軫初

揮帝子絃聲價已聞高洛紙唱酬新見疊蠻箋海南异雀多文

彩輪爾毫端五色鮮

仰望龍門御李車韓公新喜得劉父眼中人物皆名士足下他
年是大家卻遇題襟來海上祇愁判袂又天涯相期努力崇明
德善護三春盛放花

南卿周三變

讀孟塗詩集卽題卷後

嘉慶辛未二月久雨僕卧吉城目病心苦孟塗先生來自江南
得讀是集燭跋酒酣喜而起舞輒筆蕪語一以爲神一以爲女
磅礴萬物綽約冰雪雲旗電駟總總離合真宰迷晦陽施陰設
闔開關機倅般莫知內外不鍵曼衍天倪處乎崑崙以襲氣母
鴻蒙運心不在手口瑤闕璇宮倏然暉空九層千門奇麗難蹤
鸞鶴嚮霄萬吭寂寥戲海龍蛇無有常家悄焉沈冥山空石青
春風夜還勾萌怒生詩家之詩杜魄李魂遙遙孤源芳草王孫

或幻蓮花香天色地熟諦視之妙空文字

鶴舫張瓊英

孟塗前集目錄

第一卷

五言古體六十一首

第二卷

七言古體四十一首

第三卷

七言古體三十四首

第四卷

五言律詩七十五首

第五卷

五言律詩六十六首

第六卷

七言律詩九十首

第七卷

七言律詩七十五首

第八卷

五言長律十五首

第九卷

五言絕句一百四十首

第十卷

七言絕句一百十五首

孟塗前集五言古體卷

桐城劉

開明集

雜詩

日出扶桑隈曉色臨高臺原野望無極悲風從西來孤鶴飛雲
中日夕獨徘徊高天多朔氣羽翼爲低摧思集琅玕樹秋陰寒
未開高鳴不自覺聞者有餘哀

陽春二三月流絲正飛揚南國多游女近在水一方飄飄紫纓
袖灼灼丹霞裳宛轉流姿媚顧盼生輝光少年爭嘆息解佩欲
相將良家有好女終日處空房顏色雖絕代未得比羣芳羣芳
豈難比佳人自深藏平居厭華服曉起羞嚴妝高堂不輕出敢
曰立修廊春風從何來吹我沉香床妾心甘寂寞獨居何足傷
蘭蕙生谷中桃李盈路旁停車折桃李寧識空谷香人生各有

遇非分莫相望

晨起下南山道逢一俠士撫劍何激昂鷹眸而鶚視氣可薄雲
霄乃心向文史與我敘壯懷相携入酒市白璧換珍羞黃金買
瓊醴酒酣忽長歌哀音動秋水仰視浮雲生白日不停晷丈夫
慕榮名所貴在知己世無信陵君捐軀爲誰死

新製離鸞操譜入焦尾琴臨風數揮手曲盡不成音豈伊弦變
響毋乃秋氣侵涼颼來曠野飛鳥鳴高林感茲時物變不盡勞
人心絲桐爾何知含愁如許深

游子吟

颯颯悲風聲游子門前路阿母送至門呼兒行且住江淮波浪
高此行莫輕渡世事亦何常得失隨所遇人情有淺深物態無
新故竄此風塵驅驅彼霜與露千里雖可懷且當慎跬步再拜

願親言中心爲悚懼親訓豈敢違兒情難具訴少小事遠游爲
求薪水具膝下不承歡何以申孺慕慈烏號不祥尙能知反哺
兒今舍親遊晨昏誰倚護不怨去路長但恐歸遲暮忍淚登征
車行行至荒戍阿母尙倚門悵望兒行處良馬不肯前中途爲
我駐徘徊落日中移時始西去恐傷慈母懷不敢更回顧

雜興

白雲出林薄倏已歸山阿盛景不可常流暉當奈何人生一世
間憂思長苦多嘉會不盡樂百年忽蹉跎我有丹山信遠寄江
之沲歲晚未見達孤懷沉逝波

攬衣望四野四野何茫茫空谷多秋聲風高雲不揚涼天氣日
厲征馬去故鄉顧念同心客宿昔共羅裳歡娛永朝夕寒露忽
爲霜飛鳥離故枝各向雲中翔別促會日遠所恨川路長溯洄

明明天上月照我芙蓉樓樓中何所有白玉垂吳鉤良人隔遠
方獨坐守空幃瑤琴久不御羅幄長疑秋梧桐散碧輝望之如
雲流涼宵靜不寐天漢轉已周坐惜歲時促容光不我留何知
華屋下落葉連山邱

孤雁從何來朔風聲正哀眷言覓之子行行至荒臺園亭皆寂
寞重嶺空崔嵬撫劍長太息悲懷不能開昔我辭故居乘雲離
九垓迴颺震地起吹落巖壑隈舍彼丹瓊枝酌此黃金壘高秋
積陰發曉露零蒼苔常恐墮塵壤未得歸蓬萊嚴霜被蘭坡芳
卉忽已摧

浩浩秦川水各自涵青冥一與大河合誰分涇與涇君子慎所
交道義唯是型勿以蕭艾榮而失蘭蕙馨委棄莫復惜斗酒以

渺無極我心煩以傷

明明天上月照我芙蓉樓樓中何所有白玉垂吳鉤良人隔遠方獨坐守空幃瑤琴久不御羅幄長疑秋梧桐散碧輝望之如雲流涼宵靜不寐天漢轉已周坐惜歲時促容光不我留何知華屋下落葉連山邱

孤雁從何來朔風聲正哀眷言覓之子行行至荒臺園亭皆寂寞重嶺空崔嵬撫劍長太息悲懷不能開昔我辭故居乘雲離九垓迴颺震地起吹落巖壑隈舍彼丹瓊枝酌此黃金鼎高秋積陰發曉露零蒼苔常恐墮塵壤未得歸蓬萊嚴霜被蘭坡芳卉忽已摧

浩浩秦川水各自涵青冥一與大河合誰分渭與涇君子慎所交道義唯是型勿以蕭艾榮而失蘭蕙馨委棄莫復惜斗酒以

爲適

亭亭南山下青桂蒙孤岑芬芳久不採乃有霜雪侵高臺多朔
氣疾風無靜林鸞鶴自空來側翼如悲吟徘徊孤月間倏忽隱
層陰光耀且難接孰曰追遺音

遠行篇

人生非比肩離散所不免高高秋雁飛歷歷斷蓬轉念我去鄉
國客路常偃蹇漸與風塵親反令骨肉遠天寒酒力薄獨自勸
加飯深夜朔風涼虛室露華泣孤衾寒有霜側身苦舒卷伏枕
思故鄉夢中空往返憂來無止期忽忽歲時晚

遠游久言歸欲歸仍阻勉明知行路難不敢憚艱險涼露氣方
高明星光未斂此時游子身已到荒山嘯馬上聞晨雞車旁見
夜犬苦辛何足論且復向前規水離故壑中寧問深與淺所恨

家山雲去我日以遠

束髮事詩書抗志追先典不圖數年來乃以文辭顯才華雖見
知所願終不展渺渺道途中我車已數轉長風起前川落日下
遙嶽持以較客思未知誰近遠鄉園有桑麻待我在田畝

雜感

江漢東趨海滔滔無時休百川從之去誰能止其流仲尼困宗
國所願興東周一身不自保而懷天下憂俯念寰中人跬步唯
是求容光無遠照斥壤鮮高邱彼婦亦何知出走任其尤重陰
隱深谷安望澤九州誦彼龜山詩悠悠使我愁

豫章起崇嶺百鳥鳴其陰假彼回風力因之傳好音微言旣云
絕衆說紛如林遙遙千載下誰測高興深藻文日喧競煩響互
追尋獨有丹霄鳳寂寞玉山岑

鷓居觀物變霜露零庭槐抗言思在昔長歎餘悲哀悲哀亦何
補梁木久已摧空谷無賞音凋此廟廊才賢聖不再與靈氣鬱
鈞台青牛函出白馬漢京來運會自天啟人力奚爲哉
初日出滄海明星疎以微陽景未及落衆耀紛珠璣渺渺雲漢
間猶爭旦夕輝志士奮末光端居常苦悲每歎同袍遠寸心與
我違斯道苟不孤吾豈悔昨非

芳草不見知歲華忽云已抱此區區心日暮愁風起盛衰本無
常寒谷紛朱紫大化旣遷移誰與共終始

置酒城南隅微風清且和名謳出下里妙樂奏陽阿管絃聲激
烈賓主方笑歌清尊旣已竭朱顏亦云酡寧知高樹上朝露已
無多蓬萊有弱水願得揚其波

立馬蘭皋望瀟湘雲正愁可憐漢南女解佩此芳洲仙風隱清

渚佳會空悠悠。眷求雖未敢。此意自千秋。

精衛蓄何恨。啣石西山陰。自云炎帝女。沒後爲冤禽。捐軀安定。惜怨彼東海深。每欲平波險。斯人無陷沉。茫茫烟漲內。何能遂此心。

卽事

下馬登君堂。明珠垂繡柱。日暮羅幃開。陳筵而列俎。旨酒傾芳樽。中庭設華炬。越女解齊謳。吳姬能楚舞。微月隨風來。香氣滿重戶。四座樂且喧。一客獨延佇。恍惚若有思。低頭自爾汝。問之不肯言。涕淚墮如雨。

道中入山

羲駕不我留。歲景已云暮。空水含清華。平原澹孤素。側聆雲邊禽。微辨空際霧。谷深隱靈棲。境僻資游寓。密霏散滿林。陰靄若

迷路聞有峯，哀人刈蘭自茲去。曰：余契烟霞，適俗振高步。雖乏出世才，攝險非所懼。倚石滌塵氛，溯流冀仙遇。初瞻雲在山，迫近不知處。陟嶺窮遐觀，因風託遠慕。地迥生虛寒，峰岐曲迴互。返顧來徑失，巖壑倏非故。

龍眠山中

烟光變明晦，山氣入霏微。旣游豁清曠，曰歸惜流暉。循泉道逾曲，歷峽境屢非。纖鱗靜不起，流羽驚還飛。前嶺蔽崇巘，側步窮芳蕋。鋤雲取桂實，披露曳蘿衣。永懷鵬冠子，卷阿雲扇扉。

遣興

天地有代謝，榮枯生其間。人以方寸心，與之相往還。急風振林木，高秋雲自閒。所以賢達士，潛神於空山。身與世漸遠，憂樂不相關。俯觀山下人，勞勞趨城闕。世路鮮至性，風塵無好顏。脫俗

須及時瓊枝尙可攀

我心懷素虛蕭然卧山側行樂且不暇寧知憂與戚散步出柴扉桑麻紛在目行行曉霧中不覺衣裳濕慰心有林泉所業惟耕織庶幾物外身得以永終日

少小在田里平野何蒼蒼晨興視鴻鵠日暮見牛羊潛心旣已久物我長相忘飢驅走長道客路多羊腸不寒而戰栗豈必經風霜歸來把清尊聊以舒感傷微風來高原吹我門前桑游絲本無心亦與相飄揚物生鮮定質隨人爲低昂吾將棄時榮躬耕樂故鄉多謝雲中鳥各向天一方

終朝無一事得以長閉門此心亦何有天際孤雲存興至往東郊飛鳥向人喧弱年嬉游處長記在前村聚土以爲戲今已成高墩感之欲相問樹木不能言何如歸飲酒珍惜此流暄

偶成

孤桐榮井畔弱柳發堤東物各懷生意豈盡由春風才華遺世
賞乃志外窮邇旁人不我知謂我有深衷請問離塵鳥何事遊
冥濛

神聖垂遠謨其人已衰朽矧我非聖賢安能希遠久得有今日
身賴生古人後良辰信可懷和風來戶牖隱隱園中花亭亭牆
外柳親友舒笑容勸我酌大斗此身本虛無浮名更何有千秋
萬歲懷盡此一尊酒

俠士行

俠士出東國結居空山隈意氣橫寥廓呼吸生風雷少小讀兵
符常抱濟時才手無尺寸具思欲掃陰霾困躡復何道勉力事
毛錐天馬處轅下無以異驚駘京天霜雪厲慷慨登高臺驚風

吹古木四顧悲聲來荒塚何寥落山石勢崔嵬賢豪旣不作英
氣沉蒿萊懷才千載下矜尙胡爲哉寶劍久在篋寧不生塵灰
有感

弱年虛壯志盛名非夙心秀華謝朝景遠想生空林西游涉長
道極望愁登臨旣嘆素芳萎又感春雨淫山谿方盛漲江水敢
言深但恨所思遠沉吟空好音

清晨

清晨濯河水河水漾澄輝薄慕採芙蓉蕖香滿衣匪余愛芳
潔初衷未敢違少小結長佩被褐懷珠璣陽春不見賞翻爲聽
者悲耿耿十年心持以對朝暉

驅馬

驅馬山南郭遠過滄江樓樓高蔽白日雲氣浮中洲急水赴滄

海鰕鮓恣遨遊我欲一輕濟沉吟且復休
畏此風波險豈曰無
方舟去去涉長道暮景正西流良時不可失宿莽信難求回顧
江天迥能不增離憂

里巷吟

芙蓉發江渚秋水揚其芳朱英凝暮景翠葢垂朝陽自矜絕代
色堪爲君子裳涼飈一披拂容耀非故常搖落豈無憾不敢避
風霜

茫茫雲海月皎皎爲誰虧只因照離別遂至殘其輝與子分襟
後日夕空相思朝來忽覽鏡始知顏色衰鍾情本所願憔悴亦
何辭

嬌花發孤秀綠葉盈其枝三春日麗掩映增光輝急雨忽見
迫殘英逐風吹枝葉雖峻茂不能相護持同幹且如此已矣復

何悲

昔者卓文君容華冠西蜀永夜奔長卿同住春江曲曉露豈終
日柔條不到秋所以當爐後終自賦白頭同心忽相背何必深
怨尤不見折花人轉瞬拋道右白頭始棄捐猶是君情厚

豔陽方二月山谿桃李新綺陌諸年少採之遺所親一朝風雨
後誰復歎沉淪我來羣樹下但見委芳塵落英不忍蹴猶恐傷
餘春

白雲起何處乃渡江之干出岫雖云易入山良獨難蕩蕩誰家
子征馬跨飛鞍主人延入室贈以青琅玕瓊脂出玉椀嘉膾進
銀盤情意豈不愜客吟常悲酸三春風日暖孤雁聲自寒燕巢
蓮花寧心繫雲梁端由來異地樂未若故鄉安我欲回舟去又
聞沙波瀾登彼烏兔嶺將欲折芳蘭折來無可贈徒使春色殘

不如飲東閣醉後天地寬

秋夜

醉卧明月床夢入青莎渚覺起夜初殘獨坐無人語落葉響空堦疑是牕前雨

晚眺

薄暮出柴關臨風過古渡野鳥下空山黃葉滿荒戍欲訪故人居雲暗前村路

獨坐

披襟入東閣獨坐發長吟夜靜無風雨秋聲何處尋寒月散林影疎煙橫竹陰坐久露華重聽遠寺鐘沉但覺此心寂寧知霜氣侵

贈張二小阮

驚風來曠野羣木齊悲鳴別子西山郭相顧各吞聲吞聲復誰
道人世競紛榮軒裳矜上國騎蓋炫都城邂逅樂新知故舊日
以輕念與子結交所寶唯令名抗言篤終始遠想懷孤清天日
且不欺何論金石盟但恨別太促欲言不盡情後會自有期努
力慎所營吾道不終晦寸衷誰與明願共守此志勿復悲長征

贈別金三資舫

相知樂今夕華月共芳筵寧知君見愛乃在三載前鸞鶴本同
心不計時後先感君期我厚起坐爲流連旨酒有餘歡何必羅
清鮮天寒氣蕭瑟倏忽駒影遷流雲未得歸竟與回風旋此行
君莫惜江水深無極

明珠行答周澗東

明珠出南海中夜虹燭天豈不自珍惜佳人遠相憐相憐亦何

恃日月有迴旋恩乃怨之媒寧敢爲福先愧君懷古意贈我寶劍篇握手情何極且復指前川收珠欲置篋流影爲君圓

宴集

與君坐高堂門前紛列騎寶帳垂珊瑚華筵陳翡翠越艷與陳娥挾瑟羅相待酌酒吐微芳發歌生婉媚起舞致我辭流盼識君意良會自百年君子未云醉今宵已盡歡明日寧相棄

擬古

詩之源出於唐虞而其道亦莫備於唐虞舜命夔曰詩言志歌永言是古今之言詩者未有出此範圍者也然唯三百篇能盡二者之蘊溫柔敦厚穆如清風此言志之美也言之不足故長言之長言之不足故嗟歎之此永言之遺也唯其長言之也而其意始盡唯其嗟歎之也而意始無

盡故永言與言志二者相依爲用不可偏廢有其志故言不虛言之永而志乃見所謂一唱三歎有遺音者是也降至後世有言志而無永言徒以爲詩道性情而已而所以道其性情者不知也匪惟有虞詩歌之旨弗察卽三百篇之長言嗟歎亦無復過而問者矣蓋古之時詩與樂合三百篇之詩皆以被之絃歌故性情與音節俱臻其妙後世詩與樂分古樂亡而聲音之道不講故性情是而音節非然古節旣失則辭無往復咏歎流連之致而性情亦爲之異焉非不深且摯也而出之不覺其永則是所以道之者不如古也所以詩人或賦一事而浸淫以咏之反覆以陳之言重詞複而意不見其不足後人抒懷刻意惟恐其重惟懼其複句更語變而意不見其有餘何則言中用意者

多言外見意者少也漢魏古詩直接三百篇溫柔敦厚之遺是於言志者得矣而詩人之重復咏歎意簡而彌遠辭長而不繁亦僅存其彷彿而不能得其全也且夫風詩之妙觀之者不覺歌之而後見焉古時詩歌爲一不可歌者不得謂詩後人詩自詩而歌自歌此永言之所以失也今世所傳詞曲其中尙有重辭合歌之體未嘗非古音之遺然樂師俗工習其曲而昧其義故歌不能通之於詩學士大夫炫彼才藻矜彼性靈爲其辭而昧其音故詩不能通之於歌是則可慨也已或曰樂府諸詩抑揚委曲非可以形諸咏歌者乎曰其辭雖可歌然俚而不古卽十九首中客從遠方來甄后塘上行繁欽定情篇亦有得於永言之意然神理氣味聲音節奏較之三百篇之長言嗟嘆則似

有間識者必能辨之矣我

朝詩教浸深既有得夫性情之正復講求乎音律之原士之
有志詩歌者不可守偏而承闕余不揣固陋謬擬十餘章
以備詩中一體非敢云補前人之缺蓋欲存此見以待君
子之是正耳

誰謂君無心贈我雙南金瓊瑩以爲飾佩此懷君深誰謂君有
心言歸無好音春日傷卉木冬夜悲錦衾雖則悲錦衾憂思強
自任瞻彼羣飛鳥翩翩棲北林

與雲朗夜集

逝者忽我過如此良歲何與子共今夕有酒清且多匪酒能爲
歡同心本無他我姑極宴樂不醉無嘯歌皎月已當戶明星猶
在河

感懷

女言採穠李士言拾落梅芳春聿云暮子寧不有懷零雨自茲
滿飄風從何來周道惟茂草瞻望與誰哉

別雲朗

遭我中林下偕我南澗濱送我涉河水踐彼石鄰鄰回顧見君
立勞望感流蘋豈子無他士不如我所親東門有楊柳其葉沃
且新采之難贈遠樹之永懷春遵路以爲期要子河之濔

示劉生雪暉

鸞和遠在衢鐘鼓近聞室無口人可懷人實不我卽肅肅彼鳴
禽萋萋彼庶林無曰春可懷春實亂我心嘉勸爾君子匪勉安
厥常慎爾金玉音何憂行不臧

風雨吟寄友

胡爲君有行中道不我遇胡爲君善懷履邱不我顧維風雨之
故原有芄蘭草隰有梧樹林未見君子至如聞空谷吟維風雨
之音

別鄭夢白明府

謂余不相知執手以爲辭江漢明此志喬木亦有枝維此喬木
枝葛藟之所依秋霜拂其下榮悴分一時願言託終始在遠不
我遺我聞古同心獨處有遐思

懷陳大治

言率河之滸言循江之濱予美在遠道令儀莫可親吁嗟彼何
人予心所蘊結予口所未言予居近叢木好鳥爲後先吁嗟君
勿諼

贈張鶴舫

知子愛蘋藻爲實筐與筐知子愛佩玉瓊玖以爲將匪徒結永
好秉德期偕臧出門驂四牡我馬中傍徨所謂卷阿客乃在山
之陽道周縱云遠不敢履微行

偕雪畹出游

今者余何悲願望北流水以石投其中揚之豈能起浮沉洵有
定感嘆從茲始爲樂不及春白日云逝矣物情曷可恃好我有
之子嘉愛久云孤寧復望投李

寄陳大治

有美生南國桃李春無華豈無桃李華之子柔且嘉有美潛中
谷蘭蕙秋無質豈無蘭蕙質之子溫且淑言製錦衣裳往報瓊
瑤章中心旣云愛德音豈相忘

夜興

維天與雲漢高高臨四方明星紛以爛垂照無遺光云何宵征
客顧瞻迷周行衣繡浥多露曷不夙褰裳僕夫云戾止宿雁鳴
將翔佇立望靡騁嗟彼行路長將子無永傷我濟川有梁

有贈

菡萏生池中秋日發其華宜子盛膏沐灼灼顏如花菡萏生池
曲秋水成其實宜子佩瓊琚昭昭德如玉今宵樂邂逅風雨俟
雞鳴角枕屢與視東方胡未明

孟塗前集七言古體卷二

桐城劉開明東

登太白樓

白也昔從何方來，乃到翠螺山之隈。
錦衣花馬俱塵土，樓高百尺胡爲哉。
生前意氣凌九垓，生後風月空徘徊。
魂魄有知應歸里，定不守此荒江臺。
我今舉酒招公同，爲我重展凌雲才。
才高自昔驚瓊室，金鑾殿下揮鱗筆。
宮女如花皆卻立，辭都身去鳳臺邊。
孤帆獨挂滄江煙，雲中飲酒天上眠。
晚從采石浮江水，玉山竟倒秋風裏。
一卧荒邱古木春，夜天風呼不起。
海霞一片來東吳，照我樓上陳青蒲。
寶刀截玉盤流珠，金醴酒銀臺酤。
北斗浥來不用沽，公能與我同飲無。
欲酌未酌心躊躇，起視寒色橫高梧。
白雲在地不可拾，青天倒水無人扶。
夜深露氣侵華燭。

撫劍爲公悲駿足詩成能使鬼神泣一生無計諧流俗倚馬干
言動至尊飄零乃類韓王孫江濤不洗汨羅恨崩崖裂斷靈芝
根此時憑弔傷懷抱悵望南天秋欲老不見青霄騎白龍但見
東游之古道問公乘風去何早白日當空懸鳳藻可知牛渚西
江雲至今已覆墓門草憶我初未來塵寰與公同列金仙班公
先被謫下人間點綴東南千萬山琪花瑤草爲開顏我來後公
已千載物換星移人代改才華遭遇不如公憔悴天涯今古同
江頭相遇亦非偶胸中雲夢吐八九惜哉世無賀季真誰人能
識釣鰲手江聲忽起風蕭蕭銀河不動星自搖我作長歌擲高
閣蛟龍不敢駕寒潮明朝掉頭逐歸客此樓空復煙波色公如
不識後來期說與峨眉亭畔月

江樓醉題

長虹起寥廓空江走大荒寒光一片天外來楚吳千里何蒼蒼
且上高樓望八方桑葉之冠芙蓉裳朗吟身到白雲鄉白雲變
滅無時已隨風乍斷隨風起千古英雄今有誰青山對我生悲
喜流光一去空悠悠羲和不爲此身留無酒且吸百川水有花
不借三霄秋秋風吹出瑤臺月照見寒林露華結仰首青天低
俯首滄溟窄呼朋共探蛟龍穴不圖富貴與神仙但願人生不
離別夜深重語坐中客荻花風外雲澄碧君知此樂不可長何
不坐待東方白

次彭澤作

樓臺忽倒東南隅明月自來非人呼舉手攬之不可得須臾影
落宮亭湖我向江頭問小姑潯陽風信今到無且剪雲外珊瑚
株呼童爲我提玉壺蒲桃傾盡不足惜尙有千杯楊柳酤醉眠

欲起江之側白雲兩岼爭來扶南望大雷岼鮑書已荒蕪江聲
月色俱陳迹况我數尺風塵軀管城子玉川奴飄泊天涯爾共
吾燈前相對影不孤眼看春色如流水又送船頭十幅蒲

題友人居

天低不雨風四集亂鳥驚飛覓林息飢鷹作勢盤孤雲側日欲
下愁人立幽人愛著桑皮冠誅茅斬竹江之干月出不聞響空
寂畫靜時覺天陰寒門前古潭霧蒙密長有風雷相鬪出漁師
驚報涸無水昨夜灘頭老蛟死

題師荔扉明府紀游圖八首

觀海

男兒手扛鼎百斛吞九雲夢如一粟黃河之水落天來倒八胸
懷未爲足且臨碣石窮遐荒振衣獨立天中央觀取東南山水

之盡處乃知海天一氣無低昂六鰲釣去神山沒蛟人噴珠濺
龍頰九枝海日出扶桑倒落紅霞千萬疊蓬萊宮闕空崔嵬雲
芝仙草安在哉三山不使世人見但與風浪相盤迴玉門瑤熟
安期拾荒嶠天低雲四集一夜風來海怒號水忽騰空作山立
先生拂袖珊瑚竿到此無地天更寬已向圖中收八極不須波
外覓三韓濯足紫淵岸雲濕俯見鯢魚應太息化鵬已具垂天
翼何不怒飛決雲日長風九萬會有時慎勿久戀滄洲側

登岱

泰山高八銀河畔晴光到海青不斷齊魯昏昏一氣中萬壑千
巖何處判披圖但覺松煙亂海色高寒臨日觀是誰筆上有雲
斤割取東南天一半絕壁巒嶸凌九垓金雞一唱天門開須臾
地下金輪出照見三山飄渺之高臺有人拄杖青雲隈瑤花萬

片隨風來海天茫茫壓在底何況碣石與徂徠層巒疊嶂真圖
畫天孫應起芙蓉架不見丹霞出牖中但羨白雲生足下語公
且莫羨高處不在山吾徒置身千仞表五岳盡歸方寸間平居
逸氣橫空起况復身登雲闕裏好把齊州九點煙并入扶桑一
杯水金篋玉冊久榛蕪洞天倒裂青珊瑚七十二君俱電滅秦
皇漢武今在無借問風前五大夫

陟華

隴山秦山如盤龍一氣直走終南東潼關四扇不能遏巨靈削
作青芙蓉三峰疊立天當中蒼煙飄渺隨長風至今華陰千里
內時有飛翠浮空濛欲往逐之勢龍嵒明星錯落開心胸中
胎蕩羅西極手挾仙風似生翼醉看絕頂蒼龍飛雨雲過處天
心濕玉女胡爲向人立日日明妝媚孤質太白仙人去不歸山

中誰與共霞日太息池頭千葉蓮飛花搖蕩蒼山巔希夷高卧
呼不起洞門一閉愁雲煙羲和到此車先住毛女過後卽無路
千秋高影落黃河九曲風濤流不去獨羨落雁峰頭樹上有帝
座相通處才高自可問青天何須謝眺驚人句咸陽山色隔雲
端青鳥西來路幾盤請公更望舊長安渭水蕭蕭落日寒

聽潮

瀛海忽高霧翻入兩山怒束濤勢急震動天關掀石室天吳大
笑龍宮泣靈胥駕浪勢何驕風車鼙鼓爭怒號星河影亂天動
搖腥氣干雲雲欲濕光寒赤奪當空日已報前頭萬馬來又聞
後面六鰲出驚濤袈湧壓蓬萊沒盡雲外金銀臺縱有三千六
百之地軸一一都從潮底迴潮高作勢遏江水直挾冰山自東
起大江有力不敢爭倒退西流數百里珊瑚溢出海門東珠宮

貝闕翻青空豈知百道飛來雪乃與天地呼吸相流通煙霞出
沒有無中水神戰罷血流紅紅霞一斗同誰醉且說聽潮香案
吏獨向高樓縱酣睡耳畔爭喧風雨聲牕前疑有魚龍氣却憶
錢王當日何壯哉劍鋒掃月霜花開強弩一張水雲黑素車白
鷺皆低摧七百年內滄桑改潮聲依舊留江海清宵聽罷不知
寒明月中天散孤采江頭作賦美枚生隱隱風雷欲鬪鳴潮迴
波定雲天寂猶覺羣蛟怒未平

題樓

長江日夜爭東流勢合漢水吞中洲蒼茫一片煙波色齊赴雲
中黃鶴樓樓中仙去已千秋白雲終古爲誰留地臨南楚當空
起人立西風最上頭濤聲忽湧蛟龍怒寒煙隔斷漢陽渡欲題
數字付南天只恐地下崔郎妒崔郎縱妒何爲哉精靈久已歸

山隈江天留此舊名勝待人再展凌雲才左列麒麟之玉筆右
陳鸚鵡之酒杯銜杯舉筆對明月天風忽落座中來借問鶴飛
幾時回遨遊玉宇又金臺何不載將仙子返相與逐日鞭風雷
坐使樓中顏色開與酣萬斛泉盡瀉上抗風騷下朱賈壁上詩
句胡爲者才名自昔推青蓮甘讓他人詩占先世人才氣非謫
仙乃欲琢句追前賢追前落後終何益虛掃鸞箋劈素帛願公
手挹江漢波一洗古今之陳迹芳洲飄渺水澄清側身天末懷
彌衡高才摧折秋風裏芳草萋萋無限情武昌城外春煙綠樓
上笛寒空斷續不須更聽落梅花一夜春心滿江曲

出塞

白草捲風裹飛鏑黃雲壓地行路塞出關一望盡飛塵九邊四
面無顏色霜重衣寒如着鐵水結冰花吹不裂朝來滿地起碧

斑疑是千年戰士血大漠蕭蕭朔氣橫夕霏欲斂暮山平鳥栖
無處向人落人卽與鳥相爭行下探青海之明月上窺紫塞之
長城寒沙蔽野晝長暗劍光落地邊草驚高臺厯盡又荒域風
從匹馬聲中出不聞野火燒衰紅但見曉霧凝深黑憶昔漢兵
度臨洮年年征戰爲蒲桃秦關白骨如城高君王猶遣霍嫖姚
卽今陣雲已非昔元菟黃龍歸版籍鳳城恩澤遍天涯玉關長
有春風入牙旗晝掩熊羆寂楊柳千軍競吹笛况乃高歌出塞
人何妨醉射青鵬翼李陵臺上雲盤旋秋高不畏塵漲天男兒
舊有四方志壯游且欲窮人煙平居未作摩霄鵠邊關形勝紛
羅曰一朝射策升天都禁中爭美得頗收君不見班生投筆走
陽關雪花寒壓雲中山勲名千載照人間又不見終軍去國正
年少棄繻慷慨舒懷抱虎節高懸輝璧耀古人經綸定斗室不

待銀黃旣加日可笑腐儒弄文筆高談自謂才無敵偶聞神怪
便心疑才說沙塲欲股栗低眉伏案取高官拱手思措泰山安
人言儒術多誤國皆因此輩開其端與君共話旗亭酒射虎將
軍今在否江頭一夕驟雨來猶疑塞上鳴刁斗金城煙柳鐵山
風公已收八畫圖中我亦壯心懷萬里飛鸞尙閉樊籠裏會須
棄卻江東紙拔刀截斷玉蟾髓北出雁門踏暮紫尋公舊游之
故址掉頭徑渡交河水

望瀑

龍湫卓立天南隅石高萬丈八雲孤雲開山斷石磴裂奔泉爭
向崖谷趨初從崖落若驟雨下流百尺濺琤璦煙昏林暗深不
測半面天光乍暝黑忽然壁上飛雪花滿空散作冰霜色我聞
銀河之水澆九垓餘波灑向人間來隨風吹到靈湫隈一洗巖

端萬斛之塵埃又疑天女醉歌畢玉壺擊碎神漿溢千點萬點
當空出大珠亂跳小珠立長風來自滄海西青霄搖蕩碧玻璃
因風作態無高低有時澎湃奔流直一線急走千仞壁須臾宛
轉如雲煙千迴百折飛下天丹梯一道連雲腳重重白練當中
落倏忽平分兩片開紛飛四散如珠絡芙蓉村上月如弓照見
素影空濛中懸流穿八馬夷宮石檻離淵只尺許飛布飄飄向
人舞障前問答響未終瀑怒作聲亂人語

浮江

楚天曉色何蒼蒼青山秀出江之旁江波浩渺望無極孤帆獨
挂雲中央下浮彭澤上襄陽蓮花葉葉當風張白雲飄渺來三
湘天影與人相低昂樊口煙潭深幾尺三春芳草連空綠遙看
岼上踏歌人一時齊唱大堤曲大堤萬樹楊柳花花飛片片落

誰家斜陽欲倒驚啼鴉波平始聞榜人語江天四面八空渚漢
南遊女不可求笑殺當年鄭交甫憶我乘舟出江干小姑垂手
青雲端波心捧出水晶盤吳楚蕩漾搖清寒自矜才華絕地紀
灑酒題詩風浪裏夜深醉採馮夷宮碧氣沉沉不見底卽今飄
泊天一方與公同在水雲鄉示我八幅球琳瑯披罷雲煙生兩
廂愛此圖中江路長令我四顧心茫茫吁嗟乎丈夫不能乘風
破浪學宗慤直走江心穿日腳便當披髮下雲津釣竿一掃干
浮蘋胡爲輓粟浮江汜飛艘直上數千里江妃亦笑舊詞人此
行不爲滄浪水古今世事如東流奔馳日夜無時休坐見平川
鋪白練忽然浪起秋風頭浪高浪下搖孤艇雲影天光變俄頃
唯有數點白沙鷗隨波來去如山穩樓船遲速總由風前路遙
遙接太空看公挂席隨風去舉首南天日正紅

艷歌行

珠樓玉帳連空起一日豪華歸逝水人生行樂不及時笑殺三
春桃與李莫愁湖畔舊酒家垂楊樹樹啼雙鴉門前客來不須
報香風引下芙蓉車當筵好女嬌如玉夜酒微寒傾不足舞罷
庭前雲亂飛風吹又到春江曲

湖上曲

湖邊草何青青煙光不定天冥冥搖蕩離情日千里送盡春愁
渡江水日暮楊花又飛起樹上曉鶯啼未已

送君行

送君過江北江上風瑟瑟芙蓉出水嬌且鮮不借朝霞作顏色
採蓮衆女搖輕航行來行去花兩旁小姑愛花兼愛鳥不肯枝
上驚鴛鴦鴛鴦飛起向人去徘徊更到花深處秋來深夜寒並

立願抱寒香和露泣

明珠曲

明珠失手落池泉八水蕩漾如月圓池深可見不可得金魚
到紅蓮邊取珠濺水八花葉又見小珠生荷錢荷池久立
怪歸折荷花倚簾外燈殘月落不肯眠持珠笑掛明鏡前

郭明經索題麻姑圖

銀河不動天無波秋聲夜起山之阿涼雲墮庭月滿地人生對
酒須高歌坐中有客醉顏酡示我凌波一仙娥白雪飄飄生素
羅臨風不語意態多是何長爪來人世不攀天上瓊樹柯乃知
仙人好遊戲託居豈必在星河當時悔隨方平降反令蔡經受
譴訶百千年來供吟哦朝朝顏色春風和圖中歲月可長久瑤
臺往事浮雲過麻姑汝莫揚雙蛾仙凡萬古同消磨請問蓬萊

三去後海水深淺今如何

寄江七峰兼示陳大治

白雁不來葉飛早憶君昔踏瑤堤草東風有意媚遊人落盡楊
花春不老攜尊同上古江亭雲中酒酒澆空青天風已醉人猶
醒星馳電散今何道玉樹臨秋可常好乘舟欲往白露多江上
芙蓉奈我何

春曉詞

東方冥冥煙初生晨光半斂含空明流鶯百舌不住語似欲帶
曉呼春晴幽人獨向空山宿風起微寒入巖壁一枕西牕夢未
殘門外落紅深幾尺

寶劍行

寶劍在匣不肯鳴風雨將至忽有聲神物動靜通造化偶然拔

出秋雲生糝糊血影滅難去隱隱星精費呵護摩挲幾次蛟龍
愁淒涼一日英雄顧土中掘此空萬金可憐遇合隨升沉深埋
未滅飛騰氣不去寧知變化心解求腰下紫纏結霜花從此失
顏色身微豈敢倚長空我且攜汝置崆峒

道中見枯松感賦

枯松倒澗扶不起從此蒼龍長卧矣悲風相遇空激揚日夕哀
吟山谷裏心空節斷知何時欲傾未傾猶孤持雲根穿透有餘
力霜雪戰罷無完枝孤高本不由人意榮枯亦自關靈氣不聞
偃蹇作濤聲尙思疇昔凌霄勢安得壯士拔山力手挽橫柯更
重植吐納雲煙棲鳳翼今我胡爲徒嘆息

城南行

城南流水聲淒絕客到雕鞍不能發中宵掩淚泣孤雲仰天驚

見高樓月月華昔日開簾鉤人倚紫簫樓上頭明妝一笑轉春
色能使九月忘寒秋世間錦繡少容彩天人珠絡當風解自居
貝闕幾揚波轉瞬浮雲昨夜改玉顏摧折自秋雨此愁渺渺來
今古碧霄無盡海東沉存沒人天各難語由來好會憂思集紫
落紅塵詎相及須臾月沒更漏稀策馬歸來尙衣濕

江東年少行

江東年少愁風雨獨立空亭望空渚行行江上止復去煙水接
天天不語自云作客淪風塵可憐未識江南春前逐飛鷺後烏
鵲山木爭號疑怒人天涯池館多舊識哀管繁絃淚如積日暮
高吟動鬼神曲終月落無人惜當時一顧勞孫陽挺立奇骨騰
龍驤精靈已與物摩盪意氣不爲人飛揚十一年來霄路阻慈
孤愛割去鄉土骨肉支離驚夢魂雲物高寒森極浦臨岐未敢

久延佇似有旁人竊爾汝愁深難作歡笑言長恐相逢問寒暑
問君此語重太息江水悠悠竟何極思歸未歸君莫悲我已早
離庭幃

寄懷吳理菴先生

生平知遇半湖海先生高卧青山在神爐寶鼎鎔萬象華嶽明
星聳孤采吾鄉往歲多詞人落筆競欲奪洪鈞龍顛虎卧騰不
起先生揮出卽有神縱情巖壑恣游覽河漢摩胸天慘澹青雲
鬱氣成斑斕白日逢人露肝膽酒酣擊缺黃金甌上下人物無
千秋造化本不受雕刻笑我胡爲窮搜求憶昔終童人未識騏
驎躍地向空立先生乍見重神駿風蹄顧盼生霜色師門風義
古來稀况乃冰玉相爭輝高才自是干神怒可憐二監乘窮數
愛子摧殘心魄驚明珠雙碎恨有聲十年未盡存亡感一別空

留聚散情我今淪迹滯江閣徒有英名動寥濶意氣雲霄舊羽
毛厯盡高秋寒不落先生一劍伴荒邱隱隱龍文貫斗牛已看
文藻空前古反把心情託末流同時舊好非年少但話林泉任
歌嘯嗟我東望吳天雲後先遠近悲同調人生會合不可常昔
何歡樂今慨懷尙欲吸川呼曉日一醉直共眠扶桑

送別陳大治

孤獸索羣鳥求侶吁嗟子去吾何語江間流水深復深不識岸
頭客悽楚憶昨痛飲龍山旁高亭四顧雲開張枯林古石起顏
色看爾筆下生寒芒縱談解束日西暮感懷往事雲東去當時
盛氣無古今寧知後日悲行路同游年少亦殊絕發聲錚錚響
金鐵英姿角出爭權奇可憐天馬遜雄傑良會高歌極歡思興
闌筵散驚秋至失路君違十載心離羣我負今宵意男兒有情

恥揮淚千里寸衷豈終異江月不作別離色照人依舊發姿媚

野鳥行

野鳥啄木風悲辛江南滿眼多飢民前走後呼轉相屬平原蒼
莽知誰親自言家本淮陽境高浪決隄水馳騁蛟龍平地奪人
居千里村墟一夕靜初離水厄猶自喜忍飢求活聊至此展轉
荆榛不自存翻悔從前脫一死回看少婦當道旁抱子欲去泣
且行已經終日腹無粒嬌兒猶呼索米漿我行見此爲吞聲惜
此波浪存餘生弱肉已飽巨魚食苦口誰憐哀雁鳴昨聞官府
招問故各給金錢度朝暮少壯得延須與生老弱終傷委行路
回憶田廬蕩空際澤區何日見寧歲欲歸歸去各無家反資流
徙爲生計嗚乎王景不可得河伯敢與地爭力人命雖重安敢
惜不怨天上春漲多但恨汝生近長河

喜雨歌

歲在辛未初秋天肥遺肆虐神無權巨龍十丈鎖潭底名山不得施靈泉禾焦土裂沙塵色淒涼比戶人無食慈母牽兒夫別妻倉皇走向道路啼朝從朱門覓殘粒暮投古寺席地棲苦甘今昔一夢畢天明又各分途出草間餓骨爛始收後者招魂前者哭哭聲震天天不聞可憐白晝無片雲金烏吐焰知何意當空一炬避無地

天子深悲溝壑羣哀恤蒼生賑荒歲

勅下親頒王府錢舉天讀

詔盡流涕今年夏半又久晴人心悵望如懸旌電掣雲霄忽有色風激雷霆空怒聲吏樹靈旗巫擊鼓不乞黃金乞甘雨黃金聚處富一人甘雨所到皆樂土卒然阿香推車至樹木重蘇人

起舞小民欣喜忘

帝力坐睹風雲狎霹靂豈知我

皇仁動天

恩波能使崑池溢

上帝且欲賜有年雨師何敢愛餘瀝一雨豈卽回孤寒且喜斯
民得飽餐書生家無田半頃占星望雨忘夜永但願四海潤崇
朝一身獨窮飢亦幸作歌起視天漢靜

破鏡歌

千金買得半輪月不照合歡照離別分時未忍割恩愛缺處猶
疑竦毛髮淪落頻經煙雨侵寒光凜凜生太陰世間萬類都看
遍難補秦時未足心可堪衆手爭持覽盛年一見神黯淡纔慙
半面洞古今不露全形見肝膽金精水液鎔無煙生有光明不

羨圓觀人定不由成敗鑑物終能識正偏挂來素壁疑霜雪冷
顏瘦損春難熱百鍊功成一擲廢冰心幾寸爲君裂

咏硯

翰墨波瀾文章海片石功能奪真宰紫雲剝落精氣全伴我二
十年不改青碧隱現淺復深蛟雨先布待沉吟鬼神泣罷啼痕
在想見經營慘澹心吐納煙霧動羣目惜哉潤澤徒生腹汝身
已被磨欲穿我穎胡爲久不禿飽濡墨汁休稱雄硯田自古無
春風力耕豈得餘多地點水何能補化工苦寒十月凍不裂面
洗雲根骨露鐵元氣淋漓嗟太泄主人與汝同磨折

道上吟

余以作客往來通都偶觸所見感而賦此非云託諷聊書
情實以上達君子之聞見耳

食蕨歎

七尺壯夫竟不起床頭僵卧三日矣百畝之家無宿米旱魃欺
人一至此昔聞力田能免飢今見老農愁不死出門四望面如
灰十戶七閉三半開親里相見各無語但問何處多野菜平時
口衆鮮生理百物騰踊苦難市豐年已覺不自支矧乃展轉饑
荒裏衣裳脫盡身欲禿髓乾寧問肌與肉傷心忍得一家寒且
飽今朝暫時腹腹空終日將奈何氣短聲弱難哀歌含羞不肯
向人乞相攜覓蕨行山阿蕨深入地費窮日力盡空山始鋤
出少婦十指皆血痕揮土不顧拾蕨根死且難保傷何論拾得
盈筐竊自喜持歸舂粉供甘旨舉室得之美無比稻粱縱有非
所欲此時食蕨尙爲福君不見老翁杖頭三百錢鄉村無粟赴
市廛糴米未得飢可憐困不能行委路邊又不見素封擁穀爲

奇貨粟朽不欲救窮餓西鄰請貸轉見嗤歸煮白水烹榆皮我
獨餐蕨甘如飴安能一飽不傷悲

催科吏

婦女驚藏老稚走望見旌旗逃恐後借問逃者意云何官領百
人親催科追迫株連及比戶小民有口難言苦非敢避官如避
寇自來畏役勝畏虎官嚴役怒勢莫當生斷人命如牛羊忍將
血肉換上考鞭撻何礙稱循良如此用心尙何極火煎日夜憐
不得但嗟舊歲禾爲塵人家所餘唯一身今春絕炊已累日縱
有枯髓鍛不出不出豈能使終止官令如山違必死明日街頭
驚妻子

力役謠

生不必歡死莫惜一死方能了此役役夫歲歲應徵呼堂下聞

聶先聲額官府籍內舊有名衰老安望憐餘生欲將換免乞恩
許法嚴不得論人情長亭柳禿塵飛起紛紛追喚何時已往時
穀賤勉支持今茲荒歉將何恃傳聞大吏過郡城官催如火供
送迎敢言稍緩鞭扑行自嗟充役五十載飢寒留得隻身在長
途奔走無虛日多皇寧得顧家室官錢十枚餘在手歸來羞澁
未敢出老妻詬罵不絕辭囊中米盡兒啼飢

關下曲

白頭老生餓欲死奴僕得時啖甘美十年賣身隨權官日日黃
金足揮使百金之費人所難此輩擲同瓦礫看梁肉腐臭浪棄
地路旁見者心爲酸有時出視盛結束兩人立侍一捧褥公然
關禁敢私弛醫將片紙換金玉吏胥附紈恣爲奸國課何時能
報足權使持籌風雨寒豈知門外歌聲歡大家搜刻窮民骨尙

有餘脂飲未乾夕陽江頭斂暮色望見舟來欣喜極如此足供
今宵食汝身既飽尙肥家汝主多憂空爲國嚴寒已薄天正春
輕裘文綺光艷新冷官旁視意逡巡恨不將身作賤人

歲暮別

男生莫作貧家兒女生莫作游子妻歲十一月天清淒門前登
車門內啼送君遠出時已暮北風烈烈雲離迷行人方歸君獨
去此際遑問心慘懷牽衣欲語不能語四顧但覺天爲低憶我
適君今三載良會不待聞晨雞歸何匆匆去何促坐見芙蓉成
簇藜歡娛一日難自必百年徒望與君期且脫玉佩收靈犀待
君歸後重提携已知此別難計日臨行尙說卉木萋願君風塵
慎玉體須防道路多山谿妾今獨處幸勿慮傷君千里無定棲
君有高堂待朝哺日歸安得稍延稽賤軀委置不足惜可憐嫁

時舊羅鞋阿母親縫心力碎至今在篋生塵泥天道多岐人事
瞬浮雲自東自西直視黃沙起路隄征馬畏寒慄不嘶倚門
望君君已遠歸來拊心痛如割上堂强笑慰姑嫜忍淚未敢還
深閨

少年游

斷送古今一江水嗟我與君同至此忍能對面獨千里骨肉生
摧顏色死憶昔初嫁羞濃妝嬌怯猶不勝羅裳是時君亦擅風
采欲言不言皆斷腸年華枉自鬪花月一日天涯兩心折竟把
關山奪恩愛倒棄春光換離別江南結習好遠游傷春不顧空
悲秋少年不解惜青鬢老大無端搔白頭白頭縱歸亦已矣前
者方歸繼者起可憐除卻應門童紅顏滿室無男子吁嗟乎男
兒爭說四方志古來風雲起平地今日鬚眉遍四方何人久客

如初意良會蹉跎兒女身飛塵埋沒英雄氣勸君拂衣早歸來
繡幃手製待君開亦知君去非得已飢驅那敢戀桑梓丈夫昂
昂才足恃不游豈竟無生理終歲因人作悲喜消磨日月誤青
史妾雖巾幘爲君恥

贈子絜子實卽以留別

我昔馭景騰天池巨靈不守羣仙嬉瓊關洞徹深獨入竊來神
物天不知懷此六丁莫敢取君今乃欲發吾私異哉天半樹靈
旗二君曳之如電馳長君駘蕩青雲姿胸羅鋪鼎紛陸離癡龍
拔珠碎鱗赤太阿橫斷珊瑚枝次君文采亦殊妙盤空走險出
怪辭回波漾月冰鏡裂瑤花醉露生碧滋卽今倚劍會高閣春
陰黑壓天四垂東君苦雨慘無色天以吾輩開其奇酒酣放論
恣所快片語雄當十萬師羨君意氣寒寥廓我猶澤畔寒江離

太華少華鬪奇秀孤峰獨立將胡爲吁嗟乎孤峰獨立將胡爲
明日君看騎青螭

題鄭氏大理石障

中霄不雨天乍昏是何玉英光蔽門山翁一見忽驚倒怪此數
尺青雲根傳言異石產大理割來靈秀孤乾坤當時琳府閉未
啟春風作色煙染痕自從寶刀斷取後全山頓覺神無存飾以
香檀作雙障魚藻隱現雲吐吞文麗天成陋人巧司馬寶此如
瑤琨祝融下令收不去天遣流傳歸後昆元精豈肯落俗手靈
物終知依舊恩紫瑪瑙破琉璃裂此障長映扶桑暎先生愛奇
重手澤薦之祖廟同焚尊名山之骨星之質昭示鳳子與麟孫
米顛拜者何足論請看寶氣騰天闔

寄呈吳理菴先生

文章過眼如雲煙，安能供我千百年。生前棄擲且不惜，生後寂寞知誰傳。吾師作文解此意，不事修飾與磨礱。當其酒酣興怒發，風車雲馬爭來前。文成下筆聲落紙，如聽千巖萬壑之飛泉。嗟我年少愛雕琢，瓊樓十二修鸞箋。飾以珠玉洗以鉛，五丁力所不到處，月脅破裂裂天心。穿終嫌斧鑿傷大雅，聲色雖具神未全。邇來醉咏春風顛，游心物表歸自然。論文不計工與拙，作賦不思白日懸。高者爲天下爲淵，付與千秋飛躍之魚鳶。

晚泊贈僧

今秋我從江上來，曉寒斂雲雲不開。驚浪拍天苦難渡，青山爲我久低徊。枯僧宴坐山深處，指點晴霞自來去。邀余過澗呼蒼龍，不知隔嶺斷行路。石上流泉瀉芳潔，樹古霜皮吹不裂。亂鴉忽向夕陽噪，明日潯陽天欲雪。

邱貞女詞

缺月昏昏暗江汜風刀劃斷雲千里丹山石破文鳳摧血濺桐
花枯欲死一死不盡百年心願代夫君作男子毀鏡折釵從此
始恨血斑斑淚痕紫可堪縞素拜尊章猶是香閨一女士丹旄
何來暮山址痛哭荒郊憤泉起薄命蕭郎竟已矣蒼草拔心恨
不止千古寸衷有如此此心一片澄江水

月下吟

明月不解飲亦到酒杯來舉酒吞月不能盡瑤光依舊浮滿杯
今我與君共徘徊坐見席上生瓊瑰蘭膏銀燭安用哉夜深清
漢雲霞滅玉繩低挂露華結借君天半之餘輝照予飲到東方
白東方欲白可奈何水晶簾外起橫波銀樽斜倒朱顏酡人生
歡樂能幾多茫茫四海若無月煙波花鳥有何色月下無我長

來游青天不樂素娥愁人月同在清風裏彼此世間成兩美可笑玉兔藏廣寒與余遠隔千萬里舉杯邀月春風前當時曾有李青蓮詩成珠玉落九天謫仙一去浮雲改月光冷落千餘載何期遇我滄江頭重散高天舊華采嗟我疎濶才不羈邀游六合無親知偶然舌下吐河漢山鬼竊笑羣兒訾惟有皎月不相棄年年與我長追隨白玉臺前桂煙綠歌管筵前紛結束何不飛下碧雲端去照雕欄十二曲乃知此月解憐才獨與幽人破寥寂孤雲皎皎寸心明我今得月如友生人間天上各殊路一夜樽前萬古情

孟塗前集七言古體卷三

桐城劉開明東

擬古四章

取彼明珠與夜光造爲合歡雙玉堂請君端坐錦瑟旁待我風
前製酒漿雜以同心之金屑投以百合之名香君今飲此毋相
忘前途歡樂方未央人生窮居何所望得時携手娛年芳莫作
林間共棲鳥風來各自東西翔

我有太古琴得自崑崙岑外無鸞鵲之華絃中有鳳凰之好音
携來偶置北牕下夜深長雜風雨吟白日迢迢歲將晚凋此雍
門千古心君如與我有同好聊以相贈明素襟爲君更造珊瑚
篋藏之勿被風塵侵

飲馬長河曲水石蒼蒼怒相觸挾劍步高崗朔風四起雲低昂

燕雀非無志但不出雕梁丈夫獨居發遐想安能抱璞守故鄉
揚帆徑作長游客岸有花兮江有月仰天欲訴生平心河漢無
聲素娥默我有相知在何方溪之曲兮山之陽楚水微波天欲
霜思之不見心徬徨空庭獨坐露沾裳明月未出生寒光秋風
蕭瑟蘭自芳美人雖遠終難忘欲往遺以雲漢章起視大川無
舟梁舟梁有兮亦何望不見黃鵠悲故鄉

爲師二題畫

十年夢繞金華峯洞天開老青芙蓉流水無聲出深谷春風搖
蕩蒼煙濃停車悵望不能到時有雲氣來心胸君今得此佳山
水夢中與我曾相逢橫空積翠何葱蘢陰崖不雨吟蒼龍林壑
微茫夾古寺煙深不見人鳴鐘或言天風拂瑤草上有白鶴之
行蹤問君欲往誰能從我聞蓬萊方丈高萬重重重都有白雲

對碧桃仙子舒笑容待我石上倚青筇君若相隨踏明月此圖
且挂東溪松

江南曲

江南二月天微和滿空碧色如煙蘿坐見輕舟蕩春水須臾日
落生紅波郎上堤頭妾岸北唯恐春愁消不得桃花含笑柳成
絲借問東風果何力昇平日久人歌吟天高忘卻春暉深願君
且住雲中瑟聽我區區下里音

木闌干上雲爭集木闌干下何人立同在三春煙景時燕語鶯
歌子規泣昨日尋芳南陌頭聞君欲泛廣陵舟廣陵豪盛耀江
曲車蓋如雲人似玉一斛明珠買笑歌尙說今宵歡未足朱樓
夾道芳草生瓊花千載歸太清有心願借紅橋月分作人間處
處明

旌旗掩映朝霞紅珊瑚鞭壓連錢驄入門寶帳翻驚鴻春風高
會銀臺東茱萸女結蒲桃束醉舞飛花落金谷看罷庭前渾是
雲不辨鴛鴦三十六斜陽忽倒瓊樹柯爭催鳳蠟安銅荷珠簾
欲掩暮寒多魚關隱隱沉蓮漏更把瑤絃向風奏門內歡娛門
外愁可憐月色明如晝

妾家近住長千里日飲秦淮渡頭水深淺年年各自知未識郎
心竟何似郎行不定江上雲可憐遠賈似從軍誰將暮雨吳娘
曲寄與天涯孤客聞飛鴻昨夜過南浦爲報郎歸到江渚黃金
脫盡青雀空相見秋風各懷愁自拔金釵典繡衣街頭換得瓊
漿歸爲郎拂起鴛鴦帷月墮銀壺雲滿地且向中宵同一醉樽
前莫悔往浮梁深閨自有驅窮計人生貨殖貴逢時勸郎北地
買臙脂歸來盡染芙蓉露好逐登場傅粉兒

送許竺谿之金陵

明珠不列五都市深山窮海誰驚視天馬不向雲路馳縱有伯
樂何由知丈夫有志扶輪軸安能終臥溪山所以萬人爭探
驪龍珠而君亦與相追逐我今搔首龍山道短衣空覓瑤堤草
可憐白雲天外鵬竟作青油幕上鳥卻憶去年浮巨槎半江春
浪湧桃花朝捲湘簾傾玉酒暮持蓮鐔劈丹霞黃童自謂才無
比手抉天章橫地紀那知君挾風雲萬里來使我胸中積塊爲
之開我旣不能重起杜陵老何人拔子抑塞磊落之奇才征車
去後無消息極目斜陽山四塞高歌獨與雲盤旋星河不動天
蒼然憶君遙隔長淮煙何期復泛皖江船皖江船繫孤城北夢
魂又繞鍾山側急挂輕帆破曉色我醉留之不可得乃知江上
故人情不及秦淮明月夕且作長歌破離寂詩魂忽捲怒潮飛

一夜隨君下采石從此鵬鶚橫九霄休向高樓懷六朝任君呼
取莫愁與桃葉煙花舊恨終難消何如歸自長板橋與余飲酒
吹洞簫梧桐風起夜蕭蕭

題鄂虛谷方伯所得明姜貞毅遺硯

驄馬臺官舊遷客手擊豺狼腹披瀝一時放逐泣孤忠萬古精
誠留片石憶昔西垣補牘時硯光掩映珊瑚枝龍香落處風雷
馳楷英鋪雪羞少微一自桑田變滄海冬青夜月沉孤采高臺
金石半消磨千里飄零硯猶在堅光不被風雨昏斷痕未逐煙
塵改江南遺落等琳球厯盡興亡二百秋山靈水怪不敢取留
與當代賢人收虛谷先生重風義得來直等商周器異物迥逢
豈偶然年深猶鬱雲煙氣雲煙飄渺人去久精靈疑與硯相守
瓊瑤可裂石可灰此物終傳千載後款文髣髴人能尋展來白

口生秋陰請看墨淚斑如昔猶是孤臣一片心

古意

所思不見歲云秋楚水未落江南愁江上芙蓉謝芳澤蕙華欲
盡將誰留背谿向嶺行夷猶見新代故思悠悠昨游芳草今衰
邱螭蛄何知鳴啾啾

捐余玉佩投琳宮江妃欲前辭路窮蹇修臨波空致語蘭旌不
到嗟回風玉蚪迎我餐瓊實荷屋椒堂宴窮日芳凝露墜覺秋
闌歡淺情深惜恩畢紅壁沙版生微寒翳帷蕭瑟盤孤鸞登高
騁望天漫漫美人重起爲君舞寂寥江外之煙雨

與君同駕辛夷車紫莖素華燦瑤瑜與君共紉女蘿帶曳余長
裾白雲外鸞皇遠來爭道前東風飄蕩芳靄連君忽分轡升九
天遺我獨後立且旋芳草含滋花臨煙心不敢怨私自憐自憐

終夕意何極有美爲余動顏色愛不能近媒多辭思未成歡酒無力願君返駕步方林中路毋寧深太息

余情本自怨秋水白蘋胡爲滿江汜漢皋初雨江欲波芳香襲予愁奈何有懷不盡秋風多思君遠隔山之阿網戶朱綬飛絲羅薜荔衣敝帶新荷愛而不見遠含睇雲容杳真漫無際初有成言涉芳洲搖落今日白蘋愁

延神曲

朝見雲飛暮無雨涼風不動桂旗舉蕭蕭木葉下滄波若有人來立空渚靈車將降先致辭獨抱芳馨遠延佇何以潔之迎玉鸞瓊茅十束藉紫壇何以賓之奉瑤席曲瓊半鉤間白壁桂酒旣酌申椒漿白日冥冥揚靈光杜蘅列堂蘭滿載神愛余能妙容采歲華零落若英寒遲暮佳期孰相待等瑟齊張歌緩節采

菱聲終見飛雪來不我留去不知江天浩蕩徒相思

遠游曲

晨馳余馬江之干江風告余以露寒蘭有素心芷有蒂長願終
歲無波瀾方舟濟此懷湘浦夕吾將欲問芳渚余玦何爲遺夫
君子佩何爲解神女光風轉蕙來無期初起靈雲倏飄雨良辰
吉日曾幾時撫劍感嘆有餘思瞻彼飛鳥去何之

望遠傷瑤草登高見明河白雲在天不自覺下有萬里之滄波
言從漢曲泛江沱玉珥按節歌陽荷瀟湘覽遍樂云多我思已
極行靡他四海縱窮又幾何

短歌行

苑彼梧與楸旦夕霜枝改衆芳各自惜良時秋獨何爲使無采
雲霓晝晦天迷離靈瑱不啟神狐疑余處椒邱自愁苦聞有佳

人召授語玉英不采誰華汝不願日月與齊光願將燭火繼扶桑

放歌行

夜如何其夜正長白露涓涓凝爲霜蘭膏明燭皎夜光沉沉遽
宇宴未央鐘鼓旣設素琴張華容二八奉羽觴被文服織結奇
璜欲前未前侍君旁吐辭不盡幽蘭芳層波乍動神飛揚發歌
宛轉聲繞梁百年易盡心慨慷今夕有酒樂且康酒酣行樂亦
云極天外雲君爲太息上有丹山號靈域鳳凰乘風振其翼瓊
花十丈芝五色汝何偃蹇山桂側保美康娛不自飾坐令狡烏
曰西匿蕙菱君黃泣何及再拜稱諾致穹蒼升高總轡吾將行
飲馬赤海挹斗漿願隨九苞爭翱翔靈氛告余曰君止占得祥
麟折左趾白露滿天雲在水勿以皇華失素履留取瓊芳待君

予我行不顧厯瑤壇丹楓蕭蕭江水寒瑤象之車涉飛瀾前有
白鶴後青鸞明霞覆我切雲冠憑虛欲上星樞端與天孫見比
雲錦與玉女言換琅玕游不能極情未歡下念人世使興闌正
倚闌闔叩珠闕雷師隱隱羌忽發太陰噓寒竦毛髮回飈折車
勢飄忽翠旗孔蓋落洪流我身乃墜江中洲杜若淒淒菡萏秋
送余擊楫登桂舟歸進華酌聊舒愁前夕之飲星月明白榆錯
落金斗橫美人何在風淒清感今懷昔生悲情鴻雁寄征過南
浦蟋蟀無端當戶語余室漂搖甚風雨榮華將落不我與靈氛
見笑神杳冥長天渺渺唯酒星

怨別詞

谷風淒淒陰雨垂君子言別我心悲雖無好音能惠汝終歲未
云憚勞苦夫也不良初未知使我終難忘誓語出門楊柳猶依

依昔迓車來今送歸

春閨曲

彼君子女淑且閒穠李爲質桃爲顏其服維何繡與錦綠裏朱
華耀朝景其佩維何瑤與瓊雙環半壁素絲輕良人不來日懷
止采綠求桑曷云已春蘭作膏美容光獨旦無人誰爲芳

膏車

膏車出游寫我思曰歸曰歸行遲遲芄蘭有葉桑有枝心欲贈
君口無辭且指河水深爲期邂逅莫令歡不至別後善懷遠難
致肯酒旣罄筵更肆君知此醉能如何夜興不見露零多

愁怨

日之夕矣天又涼佼月欲出勞人傷錦衾角枕爛無色夜坐達
旦思徬徨君自汎舟去江潯漂風日吹誰和女豈其在遠無偕

行豈具有懷必獨語今夕何夕霜露清三星照君何方明蟋蟀亦知入牀下從不出戶當風鳴

維子

維子之酒可忘憂維余之懷可言愁吁嗟柔桑好容澤亦與卉草同歲秋鳴琴鼓瑟重命酌如此良夜胡不樂有客好我須偕來無使中道謂余薄葭蕀流水江之湄伊人不遇心相知朝來貽我瓊玉枝愛而樹之不敢私

寄光栗原

春日遲遲鴻北飛山南水滸行人稀昔我往矣君方歸折柳中道喜且悲豈敢言悲懷故微我行雖遠心難違我車未出愁渴飢自君之去將誰依野有卉草徒萋萋吁嗟我生何所希胡使雨雪常零衣

黃鳥

黃鳥黃鳥來何時我今有言爲致之南山嘉木高有枝出入雲
雨光陸離上爲鸞鳥之所集下爲幽人之所依何不直前一導
辭曰秋風至是爲期載飛載止樂且宜周顧四方從所思嗷嗷
衆側嗟胡爲射夫張弓鵲飛急汝不自知人歎息

春閨曲

山鳥爭呼雨初足風過溪泉響鳴玉佳人獨立天孤寒日晚高
樓拾空綠少年自倚顏如花長向天邊鬪彩霞誰知怨別兼愁
暮壁樹枝枝暗落華容華落盡空自惜聞道郎游樂窮夕江水
東流雁飛北欲往從之那可得

秦淮曲

秦淮女兒未解羞看人遠過清溪流斜倚雕牕巧避日日光已

到樓上頭東風昨暮入雲闌起見花枝一齊發走向花前香不
禁阿嬈問我春淺深

相逢曲

送君去後風還雨朝朝欲訴相思苦忽報君歸喜不禁乍對不
知作何語人生難說是離情隱隱流水爲吞聲溪頭望見雙翠
鳥飛入岸花深處鳴

過皖江有懷

丈夫擁書數萬卷倚馬揮毫若奔電未能駕鶴入九霄亦宜醉
踏芙蓉殿不然挾策走八荒東游淮海南瀟湘劈雲爲衣霞爲
裳胡爲弱冠守鄉里獨泛輕舟臨皖水投詩擲浪陽侯驚坐見
長江風四起秋風驟起池陽西我醉橫刀斷巨鯢黃塵不動蒼
鷹伏白日欲落青天低青天倒影入江渚孤帆暮捲千林雨江

豚見人拜且舞深谷煙昏獨自語

陳碩士編修至皖過訪賦此贈之

今我來自龍山西畔之高臺長風欲動亂雲開江北故人不可
見江頭流水空東來攬衣正欲窮雲屐何期忽遇蘭臺客壯懷
放歌天壤間不覺長空孤月白孤月高飛出海樓照君歸臥木
蘭舟朝來重遲粲花論意氣卓越凌滄洲是時山空木葉脫白
蘋紅蓼秋蕭索澄江不浪天影平大壑無風霞光落霞落三秋
散碧潭君帆又欲下江南語君挂帆且莫疾我有千古興亡愁
未釋願與君傾酒百觚消此胸中山突兀由來豪傑重新知況
乃相知非一時鸞鳳飛遇雲鶴翱翔必共鳴天陲看君才氣
凌江石銀管春花自神變虎觀雄名列漢霄綸禁奇文燦星斗
我猶浪迹長橋邊思耕郭少南崗田旣不能賦懸日月文倚天

又不能西向華嶽踏蒼煙徒有虛名動時賢感君一顧心茫然
吁嗟乎神蛟自有拔山力未乘風浪無人識駿馬生成汗血姿
不遇孫陽安足奇嗟君此去三千里一棹西風半江水余亦空
齋罷鼓琴幾人相對真知音雲樹蒼茫愁此心

薄命詞

爲澄波女士賦

七彩煙開榆柳出九光霞作層霄飾瑤臺玉女三千人絳閣蘭
香推第一偶因塵心謫九天寄生乃在龍山前龍山翠黛橫空
起花氣如煙凝碧水郭參差暮靄間女牆斜列春風裏羅敷
家本東南隅雕梁繡柱飾瓊琚自是天孫臨水織果然仙子愛
樓居芳年玉質餐冰雪皎若輕霞浮皓魄一枝瓊蕊出人間三
春桃李無顏色紫蕉衫子白霓裳雙鉤絲起五文章錦帶斜連
金翡翠羅裾半展繡鴛鴦自嗟弱命同衰草南山喬樹驚霜早

可憐遺卻北堂萱，瘦枝已逐秋風老。荒堦蕭瑟碧苔深，空隨阿
母哭桐陰。人銜精衛千重恨，天與靈犀一點心。蔡姬妙達絲桐
趣，謝女才堪咏飛絮。生來鸚鵡巧能言，不信芙蓉嬌有淚。芙蓉
絕艷冠羣英，桃園眷屬共心傾。寶氏夫人求刺錦，趙家女史學
彈箏。魚鱗幕捲香煙暖，鳳尾釵橫鬢雲滿。沾衣不覺露華高，啼
春每恨鶯聲短。陽鳥一去不可留，潯陽風信到江頭。宮亭湖畔
妝初出，彭澤磯邊浪欲收。已報青鸞離紫闕，更聞彩鳳下朱樓。
玉簫一夜吹金屋，水晶簾影搖紅燭。門前不羨火如星，月下但
誇人似玉。石葉衣香散錦棚，臨風彷彿步虛聲。共道七宵辭蕊
席，不妨三日作桃羹。宜家自協風人咏，寶瑟聲和識芳性。菊葉
銘成香滿懷，海棠睡起雲生鏡。從此鶯聞曙氣新，紅羅紫綺豔
青春。瓊舟銀海燦金谷，冰鏡銅盤輝玉津。畫堂竟夜香生牖，猶

復朝新怨阿母聞道西風病暮寒巫雲剪付丹爐酒武夷仙樂
將鳴秋熊羆夢入惹花幃瓊林珠樹萌瑤島香風文露下瀛洲
五雲車軫連平里客來爭慶寧馨子蝴蝶筵開北海樽孔雀屏
迎東郭履良會芳辰能幾何坐看繡壤起滄波藍田美璧成黃
土赤水明珠歸絳河雪膚花貌今何在彩雲無定隨風改一時
踪跡託紅塵千載香魂依碧海尚有珊瑚插翠釵薔薇露氣生
寒煙蓬山不辨來時路弱水誰尋去後船銅龍鐵馬長悲咽梧
葉滿堦秋瑟瑟空餘玉杵搗霜人泣盡杜鵑枝上月素車丹旄
出郊門棠梨風起悵黃昏脂埋野塚生花液火走空林認淚痕
香殘錦碎愁多少夢雨迷春天不曉一雙翠羽作灰飛八紅
芳如電掃回首高亭落日斜香櫳猶是舊兒家金雞帷接三雲
帳火鳳音沉七寶車珠璫不解鄭交甫玉簡徒思萼綠華西河

萬里無蒲節東海婦人芝已竭綠衣當日杜黃裳爲感知音傷
永別陽春舉目事皆非王孫何必怨芳菲請看今日萍生水昨
夜楊花開滿枝

題張淑文烈女哀辭後

九華煙冷銀蟾魄夜露無聲滴簾額當時玉立一天人化作空
山萬年石阿翁掩淚爲濡筆細述生平獨掩泣哀聲未斷悲風
集霜氣稜稜生滿室我初披讀惜娉婷繡襦甲帳寒虛櫺貞松
節斷雲埋綠孝竹心枯露洗青青春光采隨風燭且說瑤花未
凋日驚鸞袖接芙蓉衫九天珠珮非人間羣芳一見爲低顏十
年銀箔春風裏奉觴能得萱庭喜謝家雪落解聯吟秦氏樓高
羞獨倚一從青鳥來秋雯乘龍妙選得參軍赤繩絲已牽丹闕
彩鳳聲將下紫雲雲翻雨覆何堪道蕭史乘風歸去早可憐未

酌合歡卮種玉藍田成碧草燕閣驚聞淚濕衣麟膏豹髓無光
輝白楊紅豆皆前果碧海青天是後期金雞銅雀終蕭瑟一
玉顏腸斷絕貞魂不變石頭花恨血疑凝天上月銀蠶永閉
山頭墓門風色照千秋縱然一片心如水平不逐長江東向流